

AKASHVANI AIZAWL

REGIONAL NEWS BULLETIN

Date – 09/05/2025 Time - 7:30 -7:40Hrs

HEADLINES (MORNING)

- Chief Minister Pu Lalduhoman NABARD RIDF sum senga din tur Artui tharchhuahna hmunpui lungphum nimin khan Thenzawl AH & Vety Farm ah a phum a, Dilpuia Bailey Bridge dawh tur lung phumin Mizo Sial vulh punna hmun a hawng bawk.
- Chief Secretary Pu Khilli Ram Meena-an indona lo thleng thulha chhiatna nasa tak thleng thei laka inven dan tur inpuahchah that a ngai a ti.
- Nizan khan Pakistan missile ten Jammu & Kashmir an rawn kap a, Indian Air Defence Unit ten an lo kapthla hman vek a ni.
- Khawvel puma Roman Catholic kohhran hotu ber Pope thar atan Cardinal Robert Prevost thlan a ni.

<><><>

CM

Chief Minister Pu Lalduhoman NABARD RIDF sum senga din tur Artui tharchhuahna hmunpui lungphum nimin khan Thenzawl AH & Vety Farm ah a phum a, Dilpuia Bailey Bridge dawh tur lung phumin Mizo Sial vulh punna hmun a hawng bawk.

He hun hi Minister Pu C. Lalsawivunga leh Prof. Lalnilawma leh Pu V. Malsawmtluanga, MLA te an tel a ni.

Chief Minister chuan, Thenzawlah Arpui nuaih khat vel vulh theihna, nitin artui singsarih vel tal thar theihna dinna turin NABARD RIDF atangin cheng vbc 20 leh nuai 64 vel puk an remti tih sawiin ram mamawh hmalakna bul an tan tur chu a phurawm a, tha taka tihpuitlin ngei ni se a ti.

Mizo sial dik tak vulh punna hawn a ni chu lawmawm a tih thu a sawi a, sial hi a tlatna tur ram nei tha tan chuan ran vulh awlsam, hlawk bawk si a ni a ti a, s vulh theite tan he hmuna a chi tha an tipung chu a hlu hle a ni a, Mizo sial breed ngei humhalh pawh a tha a. Pi leh pute atanga an rohlu an ni a, Mizo hnamah dinhmun pawimawh tak an luah a ni, a ti bawk.

AH & Vety Minister Pu C. Lalsawivunga chuan Mega Egg Farm chu ram tana ro tling, hmasawinna rahbi pawimawh tur a ni a, sawrkar term hmasa berah artuiah tal intodelh ve hman tur a ni tih rilru an pu tih a sawi a ni.

Mizo Sial vulh punna Centre hi Rashtriya Gokul Mission (RGM) 2023-2024 sum cheng nuai 430 lakh senga din a ni. Breed Development and Conservation Centre ah hian Zo Sial chi tha, performance tha zawk tharchhuah tum a ni a, semi-intensive a vulh tur a ni. Sial 100 thleng vulh theihna tura ruahman a ni.

Bailey Bridge hi Vety Farm chhunga dil, Dilpui an tih maiin a dil lailia thliarkar a siam kalpawhna tura dawh a ni a. Dil ral leh lama ran chaw chinna hmun kalpawhna a ni nghal bawk. Hna hi NABARD sum cheng nuai 83 senga sak tur niin lei hi pahnih dawh tum a ni.

<><><>

CM

Chief Minister Pu Lalduhoma’n tunlai khawvela eizawn theihna pung zel chu hman tangkai thiam a pawimawh a ti a, a thawkchhuaktu ni turin kutkawih eizawna tlak thiamna neih a pawimawh thu a sawi.

Nimina Mizoram State Rural Livelihoods Mission (MzSRLM) hnuaia, Community Managed Training Centre (CMTTC) hmasa ber Thenzawl-a a hawna ah he thu hi a sawi a, Chief Minister chuan khawvel changkang zel ruala ke pen thiam a pawimawh tih sawiin eizawna dap thiam a pawimawh a ti a, midang te nena pawl insiama thawhho thiam a pawimawh thu sawiin taima taka thawh chuan Self Help Group chu dinchhuah pui tlak anih thu a sawi bawk.

Chief Minister in a hawn tak Community Managed Training Centre hi Vantawng Self Help Group din niin Vantawng Cluster Level Federation in an enkawl dawn a ni.

Tun dinhmunah Mizoram State Rural Livelihoods Mission (MzSRLM) hnuaiah hian SHG member 11,257 an awm mek a ni.

<><><>

AIZAWL TWO WHEELER TAXI

Aizawl Two Wheeler Taxi Association chuan, Ram leilung fate chanvo hum him zelna turin, hnamdang Two Wheeler Taxi khalth an awm leh awmloh dapchhuah an tum tih an sawi.

Aizawl Two Wheeler Taxi Association General Assembly chuan thuchuah siamin ramdang mi taxi khalth an awm leh awmloh dapchhuah an tum thu an sawi a, hemi kawng ah hian sawkar thuneitute leh mipui te thawhpuina an ngen thu an sawi bawk.

ATTA President Pu Lalfakmawia sawi danin Two Wheeler Taxi neitu te chuan Two Wheeler Taxi khalhtu atan ram leilung fate ngei khalhtir thin turin mipuite a ngen thu a sawi a, lirthei tihral tum te chuan, ram leilung fate hnen ah ngei tiral thin turin leh hnamdang hriatchian loh te hnen an lirthei te tiral lo tura a ngen thu a sawi.

ATTA chuan hnamdang leh ramdang mi Voters ID leh Aadhaar Card neilo in two wheeler taxi khalh a an eizawna an kal pui chu an duhloh thu sawiin India khua leh tui nihna nei zingah pawh hnamdang ILP nei te chu ILP in a phut ang nilo a Two Wheeler Taxi khalh an awm a nih chuan thuneitu hnen ah thlen zel an tum thu an sawi bawk.

<><><>

MOCK DRILL REVIEW MEETING

Chief Secretary Pu Khilli Ram Meena-an indona lo thleng thulha chhiatna nasa tak thleng thei laka inven dan tur emaw a tawrhnepe deuh dan tur emaw chu tun atanga ruahmanna felfai tak siama, inpuahchah that a ngai a ti.

Aizawla Civil Defence Mock Drill neih chungchang thlirletna nimina CS Conference Room-a neihah he thu hi sawiin Chief Secy chuan ruahmanna an siam tur hrang hrang zingah State leh District Level-a Advisory Committee din a tul thu te, District tina Satellite Phone 2 tal theuh neih a tul thu te, Hot Line mamawhna te, thingtlang kilkhawr zawka awmten information an dawn theih nan Akashvani hman tangkai thiam a tul thu a tarlang a. Indona a lo thlen thulha “Black out” pawimawhzia hi mipui ten an hriatchian hle a ngai a, a bik takin zirlai naupang te zingah Awareness campaign ngawrh taka kalpui a tul thu a tarlang bawk.

Meeting-ah hian “Black out” kalpui chu mipui ten an zawm that tawh loh thu leh beisei a phak lo deuh thu tarlan a ni a, he hunah hian Mizorama District tina Deputy Commissioner leh Superintendent of Police ten Video Conferencing kaltlangin an chhim a, Chief Secretary chuan district tin DC te chu an district theuh va Civil Defence Mock Drill hi lo buatsaih ve turin a chah bawk.

<><><>

CONTRACTORS ASSN

Mizoram Contractors Association (MCA) chuan sorkar in contractors Registration tharthawh turte June ni 20 ral hma ngeia ti tura hriattirna siam chu an duhloh thu an sawi.

Mizoram Contractors Association (MCA) President Pu Francis Lalliana chuan Mizoram sawrkar contractors te enkawlina tur Manual siam tura hma lak anih mek laia Registration renew sawrkar in alo buaipui chiam chu ngai an tih loh thu a sawi a, tun hma in hetiang fee an chawi ngailoh thu a sawi bawk a, Mizoram sawrkawr in an harsatna chu sutkian sak tura an phut thu a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PAKISTAN MISSILE

Nizan khan Pakistan missile pariatin Jammu & Kashmir-a Satwari, Samba, RS Pura leh Amria kah a ni a, Indian Air Defence Unit ten heng missile te hi an lo kapthla hman vek a ni.

Thudawn danin Pakistan chet dan hi HAMAS hoin Israel an beih dan nen a inang hle a. Pakistan sipaite hi HAMAS firfiakte ang maiin an che a. Thla hmasa khan PoK ah Pakistan ISI leh HAMAS te hi an inhmu nia thudawn a ni a. Pakistan sipaite hian Jammu, Pathankot leh Udampur-a sipaite tan hmun chu missile leh drone hmangin an bitum nia thudawn a ni a. Indian Army ten heng missile te hi an lo kapthla hman vek a ni.

Defence lam thuneitute sawidanin ramchhung khawthlang lam ramri hnaih khuaahte drone engemawzat hmuh a ni a. Heng drone te hi Indian air defence system ten an lo kapthla vek a ni. Nizan dar 11 vel khan Border Security Force ten Jammu & Kashmir Samba District-a International Boundary kanruk tum firfiakte an lo kap bawk a ni.

Heng bakah hian Pakistan sipaite hian Punjab-a hmun engemawzat an rawn kap bawk a. Pathankot, Jalandhar, Amritsar leh Bhatida te chu drone hmangin an rawn kap a. Heng drone te hi sipaiten an lo kapthla vek a. Chhiatna liantham a thlen hriat a ni lo.

Punjab hian Pakistan nen ramri km 553 a nei a. Venhimna lamah a inralring hle a. State Health Deptt. pawh darkar 24 inralring reng tura tih an nai.



POPE

Khawvel puma Roman Catholic kohhran hotu ber Pope thar atan Cardinal Robert Prevost thlan a ni. Pope thar hi a hmingah Pope Leo XIV vuah a ni a. Pope Leo XIV hi American mi Pope atana thlan hmasak ber a ni. Tunhnaia thi Pope Francis thlaktu tur thlanna hi Vatican neih nizan khan Pope thar tur hi thlan fel a ni a. St. Peters Basilica-ah mipui tamtak lo hmuaktute hmaah inlain Pope thar Leo XIV na chuan khawvelah remna thlen a pawimawh thu a sawi a ni.

